

Junk Koost önj Leek

Woorschau! *E termiin for Hüsem (29ste oktoober) heet ham aw e 31ste oktoober ferschääwen.*

En saandi, di 1ste oktoober köö et tweed stuk foont Nordfriisk Teooter, wi en loked premiere fiire. Jonk Bradlep hoonelt foon en jung wüset, wat åltens wi foon en spoosien unbekånden hiimseecht wårt. Uk Ellin Nickelsen, e schriwster foont tääł Jonk Bradlep (Junk Koost), wus deerfor deer än kiik et stuk önj. Jü wus oueremåtje tufreese mat amseeten foon har tääł, besuners heet har e schauspaalerisch lååsting än et tächnisch amseeten foont stuk gefeelen. Huum et stuk nuch ai sänj heet, fäit nuch iinjsen di 31ste oktoober önjt Husumhus önj Hüsem e möölikhäid deertu. Koorde fäit huum önjt internet uner www.teooter.de unti ouert telefoon uner 04671-6024154.

Enarken, wat et teooter stipe måå, koon intreese önj e dreegerferiin "Et Nordfriisk Teooter e.V.". Lasmootte foue en frikoord for arks premiere.



Minority SafePack Initiative



Dü bast ai åliine iinj miljoon unerschrafte for Europas maningfoolt.

Önj e 47 lönje foon Europa laawe 340 autochthone manerhäide ma mör as 100 milljoone manschne. Arken soowende europäer hiirt en manerhäid önj. Et jeeft åliine önj e EU, tubai da 23 åmtsspråke, ouer 60 regionaal än manerhäidespråke, wat foon 40 miljoone manschne snååked wårde. Da lasmootte foon e „Union Europäischer Volksgruppen“ (FUEV) hääwe en europääisch bürgerinitsjatiwe aw e wäi broocht. Et forheewen as e grutst solidaarisch aksjoon foone e manerhäide önj Europa sunt maning iirtiinde.

E „Minority SafePack Initiative“ as en påk üt ünlike forsliike for ruchte, wat et stipen foon natsjonaale manerhäide säåkere schal. Et hoodmüülj as e ruchtlik säåkering foon e manerhäide önj Europa.

Bit tu e 3. april 2018 as nuch tid tu än soomel iinj miljoon unerschrafte for e bürgerinitsjatiwe.

Unerschriwe koon huum ouert maschaked formulaar unti online uner:

www.minority-safepack.eu

Bundespräsident Steinmeier wal da Frasche besäke

*Frasch delegatsjoon tu besäk bai e
Bundespräsident Frank Walter
Steinmeier önj Berlin.*

Törsdi, di 21ste septämber 2017, heet bundespräsident Frank Walter Steinmeier e manerhäiderädj foon e fjouer autochthone natsjonaale manerhäide önj Tjüschlönj tu en drääwen önjt Sloot Bellevue lååsid. Di manerhäiderädj heet e möölikhäid deerfor njüted än diskutiir am aktuäle probleme foon e manerhäide önj Tjüschlönj. Deerbai as ploond wörden, dåt e bundespräsident önj sin ämtstid åle fjouer manerhäide önj



Tjüschlönj besäke wal. Besuners hål nüm bundespräsident Steinmeier e lååsing foon e frasche önj än kam eefter Nordfraschlönj. „Beest wus et, wan hi tu e biikeemfång, unti sügoor tut biikebränen kaame köö,“ sää e forwüset foon e Frasche Rädj, Ilse Johanna Christiansen. En jarsten indruk foon Nordfraschlönj köö e bundespräsident ål iinjen döör e mabroochte Jarling füünj.

Konferäns TUHUUPE aw Oomram

*Foon e 3de bit 5de nowämber lååsit e
Frasche Rädj tu en konferäns eefter
Oomram.*

Önj mörere berike, sü as bilding, meedie, kunst, politiek än et fermadeln foon spräke wal e Frasche Rädj da müülje for e tukamst diskieriire än dan da resultoote önj en resultatjsoon tuhuupefoote. E konferäns wårt üt madle foon e Bundesbeapdrächde for Kultur än Meedie (BKM) stiped. Önjmalde koon följik ham bait geschäftsstää foon e Frasche Rädj.


Galerie-Café önj Lunham hält ap


Sunt 15 iir heet ham e ålerekklub foon e Friisk Foriining önjt Galerie-Café önj Lunham drääwed. Ouers sunt septämber as dåt ai mör möölik. Da biise äinere hääwe beslin, dåt ja dåt Café ai mör widere bedriwe wan. E ålerekklub schölj deeram uk gau en ouder stää fine, weer ja jam iinjtooch önj e moune drääwe koone. Deeram drääwet ham e ålerekklub nü önj e tukamst önj e Friesenhalle

Kööm än akwawit ma Frasch etikät

E „Schnaps Companie“ ferkääft ouf nü köömbutle ma en etikät, weer „E sung foon e teepuns“ aw pränted as. Et wårt uk aw üüs hüüsesid ferwised, weer huum e hiilje sung hiire än maschunge koon. Uk aw e akwawit-butel stoont en fraschen slogan ma en ferwis aw üüs hüüsesid. Da butle koone bai mååst arken suupermarkt önj Nordfraslönj än trinambai kääft wårde.



 Wan dü nuch niinj **emails** foone e Friisk Foriining fäist, än åltens aw di naieste stånd weese wäät, dan schak üs din aktuäl E-Mail adräs tu: info@friiske.de

 Dü fanst e Friisk Foriining nü uk aw **Facebook**. Heer fant huum åles wat jüst önj e feriin lüüs as. Arken tørsdi jeeft et deer uk dåt "Frasch uurd foon e waag".

Impräsum: **Friisk Foriining**, Friisk Hüs,
Süderstr. 6,
25821 Bredstedt/Bräist

ViSdP: Ilwe Boysen

Wat at kamt aw üs tu?

Termiine for 2017

- **Jonk Bradlep** (Teooter)
31. oktoober kl. 17.00 önjt Husumhus, Hüsem
- **Konferäns Tuhuupe**
3-5. nowämber aw Oomram
- **Musiikweedstrid**
11. nowämber kl. 13.30 önjt üülj "Heizwerk", Bräist
- **Et Hulk Kiirt Tübääg** (Teooter)
3. än 10. detsämber kl. 15.00 önj e Nordsee-Akademie, Leek

Termiine for 2018

- **Buume soomeln**
27. januar önj Risem-Lunham
- **Wunترفäst**
2. februar kl. 19.00 önjt Fraschlönj
- **Biikeemfång**
17. februar kl. 11.00
- **Biikebrånen**
21. februar kl. 19.00 önjt Fraschlönj
- **Frasche tääle tu Padersdäi**
22. februar (Padersdäi) kl. 19.00 önjt Eichhorn´s, Risem-Lunham
- **Lasmooterfersoomling**
15. märts kl. 19.00 önjt Fraschlönj
- **Et Huuwen-Hüüschen** (Musical)
7. april kl. 20.00 önj e "Stadhalle", Naibel
15. april kl. 17.00 önj e "Alte Kursaal", Weesterlönj/Sal
29. april kl. 16.00 önjt Husumhus Hüsem
- **Tuhuupe Luupe** (fiiljkääre)
18. bit 20. moi foon Bräist eefter Ljouwert